



REPUBLIKA E SHQIPËRISË
-AUTORITETI I KONKURENCËS-
Komisioni i Konkurrencës

V E N D I M

Nr. 51. Datë 09.05. 2007

Për përqëndrimin e realizuar nëpërmjet shitblerjes së 80% të aksioneve të Bankës Amerikane të Shqipërisë tek Intesa SanPaolo S.p.a

Komisioni i Konkurrencës me pjesëmarrjen e :

- Znj. Lindita Milo (Lati) Kryetar
- Zt. Lush Përpali zv/kryetar
- Znj. Servete Gruda Anëtar
- Zt. Koço Broka Anëtar

Në mbledhjen e tij të datës .05 .2007, shqyrtoi çështjen me :

Objekt: Njoftimi i datës 13.02.2007, për përqëndrimin e realizuar nëpërmjet shitblerjes të 80% të aksioneve nga BAA tek Intesa Sanpaolo S.p.a.

Baza ligjore: Ligji nr. 9121, datë 28.07.2003 “Për Mbrojtjen e Konkurrencës”, neni 24, shkronja d, nenet 10-12, në veçanti Kreu III “Përqëndrimet e Ndërmarrjeve” nenet 53-56, 58, Rregullorja “Për zbatimin e procedurave të përqëndrimit të ndërmarrjeve”, Udhëzimi “Për formën e njoftimit të përqëndrimit dhe mundësinë për njoftim të thjeshtuar” dhe Formulari “Për njoftimin e Përqëndrimit”.

Komisioni i Konkurrencës, pas shqyrtimit të njoftimit të përqëndrimit,

V Ë R E N S E:

1. Intesa Sanpaolo S.p.a, me seli në Torino dhe Milano, Itali, njoftuesi/blerësi i pjesës prej 80% të aksioneve të Bankës Amerikane të Shqipërisë (BAA),

është shoqëri anonime, që ushtron veprimtari bankare dhe sigurimesh në tregun ndërkombëtar dhe kombëtar.

2. Në tregun kombëtar, kjo shoqëri ushtron veprimtari bankare sipas licensës së lëshuar nga Banka e Shqipërisë Nr 1/1996, datë 17.7.1998, nëpërmjet Bankës Italo-Shqiptare (BIA), ku zotëron 76.12% të kapitalit aksioner të barabartë me 118 aksione. Tregu kombëtar gjeografik i Bankës Italo Shqiptare Sh.A, përbëhet nga degët në 4 qytete Tiranë, Durrës, Shkodër dhe Vlorë. Indirekt Intesa San Paolo është e pranishme në tregun kombëtar, nëpërmjet Credit Agricole që zotëron 71.97% të aksioneve në Emporiki Bank dhe në degët e saj në Tiranë, Vlorë dhe Sarandë.
3. Fondi Shqiptaro Amerikan i Ndërmarrjeve (AAEF), shitësi, është shoqëri jo fitimprurëse, me seli në New York, SHBA, e themeluar sipas Ligjit të vitit 1989 “Për Mbështetje të Demokracisë së Evropës Lindore”, me objekt kryesor nxitjen e zhvillimit të sektorit privat shqiptar. AAEF është zotërues i 100% të kapitalit në Bankën Amerikane të Shqipërisë (BAA), me seli në Tiranë, Shqipëri.
4. Në tregun kombëtar, kjo shoqëri ushtron veprimtari bankare sipas licensës së lëshuar nga Banka e Shqipërisë, Nr. 11, datë 10.08.1998, nëpërmjet Bankës Amerikane të Shqipërisë dhe degëve të saj në 8 rrethe të vendit, si: Tiranë, Durrës, Vlorë, Elbasan, Fier, Gjirokastër, Korçë dhe Lushnje.
5. Në tregun ndërkombëtar, AAEF ushtron veprimtari bankare në Greqi, nëpërmjet Bankës Amerikane të Greqisë.
6. Për vitin 2005, xhiro në tregun ndërkombëtar e:
 - Bankës Intesa Sanpaolo S.p.a është 31.22 miliard Euro/1.921.509 miliard lekë; dhe
 - Bankës Amerikane të Shqipërisë (Dega Greke) për vitin 2005 është 1, 725.369 milion \$/165,6 milion lekë
7. Për vitin 2005, xhiro në tregun kombëtar e:
 - Bankës IntesaSanpaolo Spa është 9 milion euro/ 1.107 milion lekë.
 - Bankës Amerikane të Shqipërisë është 21.652.712 \$/ 20.786.6 milion lekë.
8. Transaksioni i njoftuar konsiston në shitblerjen e 80% të aksioneve të pjesës së kapitalit në BAA nga Intesa Sanpaolo S.p.a të barabarta me 12 milionë aksione të BAA-së. Në përfundim të këtij transaksioni, Intesa Sanpaolo S.p.a do të zotërojë 80% të aksioneve të BAA-së dhe AAEF do të zotërojë 20% të aksioneve mbetëse të kapitalit aksionar të BAA-së.

9. Ky transaksion është një përqendrim që përmbush kushtet për të qenë subjekt i shqyrtimit nga Autoriteti i Konkurrencës në përputhje me nenin 12, pika 1 e Ligjit.

10. Tregu përkatës

a) **Tregu i produktit:**

IntesaSanpaolo S.p.a është e pranishme në tregun shqiptar që nga viti 2006, sipas licencës nr. I/1196, datë 17.07.1998, për ushtrim veprimtarie në fushën bankare, konkretisht:

1. Pranimi i depozitave bankare (në formën e depozitave pa afat, me afat ose formave të tjera të depozitave), për të cilat paguan ose jo interes;
2. Dhënie kredish, duke përfshirë kredi konsumatore dhe hipotekare, faktoringun me ose pa burime ndihme dhe financimin e transaksioneve tregtare;
3. Marrje hua të mjeteve financiare dhe blerje ose shitje për llogari të saj a për llogari të klientëve (të instrumentave të tregut të parave si çeqet, kambialet dhe çertifikatat e depozitave; të letrave me vlerë të borxhit; të kontratave të “së ardhmes“ dhe kontratat “e mundësive“ që lidhen me letrat me vlerë të borxhit ose normat e interesit; të instrumentave të normës së interesit);
4. Kryerjen e shërbimeve të pagesës;
5. Emetimin dhe administrimin e mjeteve të pagesës, duke përfshirë pagesat me kartë, me çeqet e udhëtarit dhe çeqet e bankierit;
6. Ndërmjetësinë për transaksione monetare, përfshirë valutat;
7. Lisingu financiar;
8. Kryerja e shërbimeve si agjent financiar ose këshilltar financiar (nuk përfshihen shërbimet që përshkruhen në pikën 1 dhe 2),

b) **Tregu Gjeografik:** Territori i Shqipërisë. Rrjeti aktual i Bankës Italo Shqiptare Sh.A, (Tiranë, Durrës, Shkodër, Vlorë); BAA (Tiranë, Durrës, Vlorë, Elbasan, Fier, Gjirokastrë, Korçë, Lushnje) dhe Emporiki Bank (Tiranë, Vlorë, Sarandë).

c) Vlerësimi i impaktit në konkurrencë

Transaksioni konsiston në përftimin e drejtpërdrejtë të pronësisë së pjesës të BAA-së në tregun bankar, nëpërmjet procedurës së shitblerjes së aksioneve.

Duke iu referuar indeksit të përqendrimit, mund të themi që pas përqendrimit tregu i asetëve dhe i kredisë është mesatarisht i përqëndruar, ndërsa tregu i bonove të thesarit dhe depozitave është shumë i përqëndruar. Intesa San Paolo S.p.a në krahasim me bankat e tjera mban një pozicion kryesues në tregun e kredive, ndërsa në tregun e asetëve, të depozitave dhe bonove të thesarit, është Raiffeisen Bank që kryeson dhe kjo vetëm si rezultat i trashëgimisë të pozicionit dominant në tregun e produktit dhe infrastrukturë nga Banka e Kursimeve.

Nga analiza post-përqendrimit, vërehet se tregu është i hapur për konkurrencë, pa barriera hyrëse dhe karakterizohet nga prania e konkurrentëve të fortë, me pjesë tregu të konsiderueshme dhe konkretisht në tregun e depozitave, bonove të thesarit, kredive etj. Përqendrimi sjell ndryshime në strukturën e tregut bankar, duke e forcuar dhe rritur pozicionin e Intesa Sanpaolo S.p.a jo vetëm në tregun e kombëtar, por edhe në atë ndërkombëtar.

Pavarësisht nga sa sipër, ky përqendrim i parë në këndvështrimin e efikasitetit të tregut, rrit konkurrueshmërinë në tregun bankar, zgjerimin e tregut të produktit dhe tregut gjeografik duke nxitur futjen e shërbimeve/produkteve të reja dhe numrin e degëve dhe agjencive në nivel kombëtar, rritjen e standarteve të bankingut për shkak të eksperiencës që ka Intesa San Paolo S.p.a në tregun ndërkombëtar, etj.

PËR KËTO ARSYE

Në bazë të nenit 24, shkronja d, dhe nenit 56 pika 1 të Ligjit nr. 9121, datë 28.07.2003 “Për Mbrojtjen e Konkurrencës”

VENDOSI:

1. Të autorizojë, përqendrimin e realizuar nëpërmjet blerjes së 80% të aksioneve të Bankës Amerikane të Shqipërisë nga kompania Intesa San Paolo S.p.a, Itali.
2. Ky vendim hyn në fuqi menjëherë.

KOMISIONI I KONKURRENCËS

Lush Përpali

(_____)
Zv/Kryetar

Servete Gruda

(_____)
Anëtar

Koço Broka

(_____)
Anëtar

Lindita Milo (Lati)

K R Y E T A R